



28. Marts 2019

UPA 2019/25

Atassut

Aqqaluk Heilmann

**Inatsisartut aalajangiiffigisassaattut siunnersuut Namminersorlutik Oqartussat ilalissagaat piginneqqaartussaataaneq pillugu inatsisip Kalaallit Nunaanni atortuulersinneqarnissaa Kunngip peqqussutaatigut**

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Kunngip peqqussutaatigut nunatsinni inatsisip piginneqqaartussaataanermut tunngasoq taperserlugu akuerivarput.

Pissusissamisoorpoq teknologip pitsanngoriartuaarnerani, siammarterisarnerullu ajornanngissiartuinnarnerani inuit suliarisimasaat inatsisitigut tamarmik illersorfissaqartumik inissisimanissaat.

Atassummiit immikkut ilanngukkusutarput eqqartortikkusutarpullu tassaavoq nipilersortartut suliarisartagaannut pilersittarsimasaannullu attuumassuteqartoq.

Tassani taallanik erinnanillu piginnittuusoq koda aqcutigalugu illersorfeqareeraluartoq tamanna aamma allatut periuseqartumik illersorfeqarsinnaanera ullutsinni atueriaatsip takutippaa.

Soorlu internet-sikkoortut aqcutigalugit saqqummersinneqarsimasarnermi facebook, youtube, il.il tusarnaagassiarineqartarnerini immiussamik piginnittuusoq illersorneqarnera killeqarpoq.

Uani pineqartoq tassaavoq, nipilersugaq qanorsuaq tusarnaagassiissutigineqarsinnaavoq kisiannili piginnittuusumut aningaasatigut pissarsissutigineqaataanngitsumik, taamaallaat internet-simik atuititsisuusut kisimik download-terneqarnerani iluanaarfissaanik.

Naatsumik oqaatigalugu, kalaallit nipilersugaat internetikkut siammarterneqartuurtarput, atuisut tele-mut akiliutigisartagaannik. Ajoraluurtumillu amerlasuut akuersissummik peqqaaratik allat nipilersugaannik facebook-ikkut, youtube-kkullu ikkussuisarlutik.

Nipilersortartortavut akileraartittarniarutsigit aamma illersornerusinnaasariaqarpagut. Pingaartumillu ullutsinni saqqummersitsisarnerup akilersinnaajunnaariartornerani annertunerusumik illersuinerusariaqalerpugut.

Nunatta avataanut tunisaqarsimanermi soorlu atuakkanik, taannalu nunap pisisuusup nammineq nutsersimappagu innuttaminit paasineqarsinnaasunngorlugu taamaakkaluartoq piginneqqaartussaataasoq illersorfissaqartuurtariaqarpoq.

Assersuutigineqarsinnaalluarpoq Kalaallip qajaa saaqqutaalu.

Siornatigut qaanniormik saaqqutaanillu ilinniutit naqitanngorlugit sananeqartarnikuupput, tassunga ilanngullugit kalaallit qajarsornikkut kinngusaqattaarnikkut allunaariaqattaarnikkullu



periusitoqarsui ilanngullugit, malitsigisaanillu USA-mi innuttaasut ilaannit annertuumik kalaallip qajaa iluanaarniarfigineqartarnikuunera ilisimaarineqarluni.

Taamaattumik piginneqqaartussaataaernermit siunnersuut taperserparput akueralugulu, siunnersuullu ataatsimiititaliamut innersuupparput nipilersortartunut attuumassuteqartoq naliliiffigiteqqaarusukkatsigu ataatsimiititaliami ilaasortanit.